

Governu submete proposta OR ba PN ho valór Billaun \$ 1-resin

DILI, 27 abril 2022 (TATOLI)-Governu ne'ebé representa husi Ministru Finansa, Rui Gomes ho Ministru Asuntu Parlamentár no Komunikausaun Sosiál (MAPKOMS) Francisco Jerónimo, kuarta ne'e, submete ona proposta orsamentu retifikativu (OR) 2022 nian ba Parlamentu Nasionál ho montante billaun \$ 1.129.

Prezidente Parlamentu Nasionál, Aniceto Longuinhos Guterres Lopes, maka simu direktamente proposta OR 2022 ne'e husi Ministru Finansa, Rui Gomes, iha Parlamentu Nasionál.

Rui Gomes hateten governu apresenta orsamentu retifikativu ba PN ne'e hodi finansia programa hamutuk 13 ne'ebé maka Governu aprova ona hanesan kriasaun subsidiu ba veteranu sira, pagamentu subsidiu \$ 200 ba uma-kain sira iha fulan-dezemburu 2022 no seluk tan.

"Hanesan pagamentu \$200 ba uma-kain sira iha dezemburu ne'e, Ministériu ne'ebé tutela maka Ministériu Administrasaun Estatál (MAE), ida ne'e maka ita foin transfere sai,"Ministru Finansas Rui Gomes dehan.

"Ami apresenta mai iha ne'e, Parlamentu atu tetu maka adisionál no sub-plementu no osan sira ne'e ita sei tau hamutuk iha dotasaun todú Governu," Nia esplika.

Iha fatin hanesan Prezidente PN, Aniceto Longuinhos Guterres Lopes, informa sei baixa ba Komisaun C Komisaun Especializada iha Parlamentu nasional hodi halo apresiasaun.

"Maibé Orsamentu Retifikativu ne'e Governu husu prioridade urjensia, entaun Parlamentu tenke apresia uluk pedidu urjensia ho prioridade ne'e," nia dehan.

Governu husu ba PN atu halo diskusaun ho karakter urjensia, maibé meja Parlamentu Nasionál sei baixa ba komisaun especializada atu halo audensia ho lina ministerial sira antes haruka ba plenaria hodi halo diskusaun no aprovasaun.

"Ida ne'e tanba karakter urjensia parese loron ida ka rua ba debate jeneralidade, no loron tolu ka haat ba especialidade,"Prezidente Parlamentu Nasionál Aniceto Longuinhos Guterres Lopes hateten.

Tuir nia PN sei buka atu halo diskusaun ho karakter urjensia ba proposta ezekutivu ne'e hodi aprova antes mandate Prezidente Repúblika Francisco Guterres Lú Olo ninia mandatu sei remata iha loron 20 fulan-maiu 2022.

Entretantu, proposta orsamentu retifikativu ne'ebé maka Governu submete ba PN atu finansia programa hamutuk 13 ne'e mak hanesan tuir mai.

- 1.Atribuisaun osan fulan da-13 ba kada família (esetu funsionáriu públiku sira);
- 2.Projetu Uma Kbiit Laek Plus;
- 3.Bolsu Estudu ba Mellór Graduadu Estudante Ensinu Báziku no Sekundáriu;
- 4.Kriasaun Fundu Veteranu;
- 5.Programa Maun do obra ba Postu Administrativu (PEMOPA);
- 6.Hari'i Sede Arte Marsiál no Rituál;
- 7.Programa Ensinu Distánsia (Eskola iha Uma);
- 8.Internet gratis iha eskola sira;
- 9.Empregu ba mellór alunu universitáriu sira;
- 10.Estabelesimentu Sekretariadu ba Assuntu Traballadór Esteriór no Komuidade Timoroan iha Diáspora;
- 11.Revitaliza kafé no subsidiu ba kafé Laku-teen;
- 12.Subsidiu akomodasaun ba PNTL no F-FDTL;
- 13.Pagamentu ba diferenca remunerasaun PNTL nian ho rejime salariál foun, ho total benefisiáriu 4.096.

Enkuantu,antes ne'e montante tetu OJE 2022 ne'ebé Governu submete ba PN ho montante billaun \$1,675, ne'ebé millaun \$233 ba saláriu no vensimentu, millaun \$449,98 ba bens servisu, millaun \$565,9 ba transferénsia pública, millaun \$24,4 koresponde ba kapitál menor no millaun \$401,7 ba kapitál dezvoltamentu.

Maibé liuhosi debate especialidade iha proposta adisionál mai ho proposta hamutuk 165 representante povu no hosi proposta hirak ne'e mak halo adisionál millaun \$300-resin, nune'e halo tetu OJE 2022 sa'e ba billaun \$2 tanba atu utiliza ba nesesidade povu no nasaun.